



ANGGOTA Imigresen memotong pintu rumah yang berkunci.



PENGUATKUASA DBKL meroboh bilik yang diubah suai di Flat Hicks, Jalan Changkat di ibu negara.



Oleh Mohd Haris Fadli
Mohd Fadzil
harisfadli@hmetro.com.my

Bund Shanghai diserbu

71 Pati ditahan di Flat Hicks dalam Ops Mega Bersepadu KL Strike Force

Kuala Lumpur

Lokasi berbau najis dan hancing tidak menghalang pendatang asing tanpa izin (Pati) menyewa di Flat Hicks atau dikenali sebagai Bund Shanghai yang terletak di Jalan Changkat di sini.

Seramai 71 Pati ditahan dalam Ops Mega Bersepadu KL Strike Force di bangunan usang di tengah kawasan segi tiga emas di sini dan dianggarkan berusia lebih tiga dekad.

Wartawan Harian Metro yang menyertai operasi itu kira-kira jam 12 tengah hari semalam terpaksa memakai pelitup muka berikutan bau busuk yang kuat sejurus menjejak masuk ke bahagian bawah premis berkenaan yang juga dipesuni sampah serta kesan ludahan air sireh.

Ketika serbuan dijalankan ada Pati bertindak nekad terjun dari tingkat empat ke tingkat tiga bagi mengelak daripada ditahan pihak berkuasa namun gagal meloloskan diri.

Pengarah Jabatan Imigresen Malaysia (JIM) Kuala Lumpur Wan Mohammed Saupee Wan Yusoff berkata, operasi bersepadu itu dijalankan susulan aduan awam berhubung kehadiran Pati dan bau yang kurang menyenangkan dari premis enam tingkat itu.

"Seramai 150 individu diperiksa membabitkan 30 unit kediaman di premis yang berada dalam keadaan menyedihkan, kotor, berlaku kebocoran air di mana bagi saya tidak sesuai didiami.

"Seramai 24 warga Bangladesh, Myanmar (30), Nepal (8), Indonesia (7) dan masing-masing seorang dari Thailand dan Pakistan," katanya di lokasi serbuan di sini.

Sementara itu, tinjauan Harian Metro mendapati kawasan itu sudah ditutup



SEBAHAGIAN warga asing yang ditahan dalam Ops Mega Bersepadu KL Strike Force. - GAMBAR NSTP/ASWADI ALIAS

dengan pagar besi warna biru dan ditampal notis merah daripada pihak Dewan Bandaraya Kuala Lumpur (DBKL).

"JIM dan DBKL akan mengenal pasti pemilik premis yang memberi sewa kepada golongan Pati terbabit dan akan dikenakan tindakan undang-undang"

Pengarah Jabatan Imigresen Malaysia (JIM) Kuala Lumpur Wan Mohammed Saupee Wan Yusoff



ANGGOTA Imigresen mengiringi Pati yang ditahan dalam operasi untuk menaiki trak.

Menurut beberapa Pati yang ditahan, kadar sewaan sebuah bilik di situ adalah antara RM400 hingga RM500 dan sebuah rumah mempunyai hingga enam bilik yang dibina menggunakan kayu sebagai pembahagi.

Ada juga Pati menjadikan ruangan dapur yang sempit sebagai bilik mereka dengan hanya beralaskan bantal dan cadar di atas lantai.

Difahamkan, kadar sewa yang murah dan lokasi premis itu yang terletak di tengah ibu kota menjadikan ia tumpuan pekerja warga asing menyewa di situ.

Mengulas lanjut Wan Mohammed Saupee berkata, ada segelintir majikan dikesan menyewa unit rumah di premis itu kira-kira RM2,000 sebulan dan mengenakan caj RM100 dari setiap pekerja mereka.

Katanya, semua pihak terutama pihak pengurusan bangunan dan pemilik rumah diberi amaran supaya tidak menyewakan premis milik mereka kepada golongan Pati.

"Pihak pengurusan bangunan mempunyai kuasa bagi memastikan bangunan itu selamat dan selesa didiami, sekiranya mereka tidak ambil tindakan JIM akan ambil tindakan atas kesalahan melindungi Pati.

"JIM dan DBKL akan mengenal pasti pemilik premis yang memberi sewa kepada golongan Pati terbabit dan akan dikenakan tindakan undang-undang," katanya.

Operasi yang turut disertai pasukan penguat kuasa DBKL dan bertindak meruntuhkan struktur haram di dalam premis itu serta sepasukan polis bagi mengawal keselamatan petugas.